

**Date – 07/03/2026**

**Time - 7:30 -7:40 Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. Vice President Pu C.P. Radhakrishnan chuan vawin chawhma dar 11 ah Mizoram University (MZU) Convocation vawi 20-na a hmanpui dawn.
2. Nimina Assembly Session-ah Dampa bialtu MLA Dr R. Lalthangliana resolution put luh IAF in Lengpui ram an lei chungchang CBI-in an chhui chhuah thuai theih nan Mizoram sorkarin rang taka bawhzuiin chak takin hma la rawh se tih chu lungrual taka pass a ni.
3. Mizoram Universal Healthcare Scheme (MUHCS) zawm duha sorkar dawrtu Mizoram chhunga private damdawi-in 13 leh sorkar chuan damlo enkawlna leh a kaihnawih man chungchangah inremna an la nei thei lo.
4. Prime Minister Narendra Modia chuan agriculture-ah tunlai khawl thiamna technology culture hnuk lut tam turin sawrkarin theihtawp a chhuah a ti.



## VICE PRESIDENT

Vice President Pu C.P. Radhakrishnan chuan vawiin chawhma dar 11 ah Mizoram University (MZU) Convocation vawi 20-na a hmanpui dawn.

Vice President hi nimin chawhnu khan Mizoram lo thlengin Tun hi Vice President a nih hnua Mizoram a lo tlawh hmasak ber a ni a.

Vice President hi Lengpui Airport-ah Larsap General (Retd) Vijay Kumar Singh, School Education Minister Dr. Vanlalhlana leh official dangte'n an lo hmuak a. Lok Bhavan-a lo thlenin Larsap bakah Chief Minister Pu Lalduhoma, Home Minister Pu K. Sapdanga, AH& Vety. Minister Pu C. Lalsawivunga leh official dangte'n an lo dawngsawng a ni.

Ruahman dan chuan Vice President hian MZU Campus a thlen hnuaah thing tiak a phun dawn a, hemi hnu hian Covocation Hall panin Larsap General (Retd) Vijay Kumar Singh leh Chief Minister Pu Lalduhoma ten an tawiawm ang a, programme ah hian thu a sawi dawn bakah Doctorate degree hmu thar mi 15 hnenah lawmpuina a hlan dawn a ni.

Nizan khan Mizoram Sawrkar chuan Vice President pual hian Lok Bhavan-ah Cultural Programme leh zanriah buatsaih a ni a, Vawiinah Mizoram University Convocation vawi 20-na Khuallian nia a hmanpui hnuaah Tripura University Convocation vawi 14-na hmanpui turin Mizoram a chhuahsan ang.



## EDUCATION MINISTER

Higher & Technical Education minister Dr Vanlalhlana chuan college hrang hranga UGC-in a phut anga tling lo zirtirtute chu tun thla bak rawih chhonzawm an nih tawh dawn loh thu nimin khan House-ah a sawi. RUSA hnuai zirtirtu lakte ngheh theihna tur an ngaihtuah thu a sawi bawk.

Nimina Assembly Session zawhna chhangin Dr Vanlalhlana chuan unqualified teacher-te ban tir mai loa an qualify theih nan chance pek an ni em tih zawhna chungchangah Dr Vanlalhlana chuan, University Grant Commission (UGC)-in National Eligibility Test (NET) a phut ang nei lote chu chhawr chhonzawm an nih tawh dawn lo a, hreh tak chungin an mahni rawih chhonzawmna tur hi March thla atang chuan a tawp ta a ni, a ti.

Dr Vanlalhlana chuan heng unqualified teacher-te hi dem ngawt theih an nih loh thu a sawi a, hnaa lak an nih dawna advertisement-ah NET phut tel a nih loh thu leh a hnuah sorkarin NET nei turin a tih leh thu a sawi a ni.

MPSC-in kum 2019-a RUSA hnuai zirtirtu a lakte chu kum 2 an thawh tlin tawh chuan CSS hnuai mi an nih tawh loh thu leh kum 2 hnuah chuan an hlawh hi state sorkarin a pek vek tawh thu Dr Vanlalhlana chuan a sawi a; sorkarin ‘kum 2 hnuah a liability an tum ang’ tiin a lo intiam tawh a, ZPM sorkar chuan an nghehna tur ngaihtuahin, Council of Minister in a ngaihtuah tawh a, thil nghah hlek ngai, ngaihven ngai thil ala awm a, ngaihven a nih zawhah chuan an chungchang hi chu a rawn chhuak thuai ang a, an ngheh theihna tur ngaihtuah a ni, a ti.

<><><>

## **SESSION PVT MEMBERS RESOLUTION**

Nimina Assembly Session-ah Dampa bialtu MLA Dr R. Lalthangliana resolution 'Indian Airforce in Lengpui ram an lei chungchangah dan bawhchhiatna nasa tak leh corruption a awm ngei nia lang chu Mizoram mipui duh dan ang ngeiin CBI-in an chhui theih nan Mizoram sorkarin hma la nghal rawh se' tih sawiho a ni.

Sawihhonaah hian eptu party member-te chuan resolution hi a nihna anga pass an duh thu an sawi a; rorel lai party member-te erawh chuan resolution chu siam danglam hret a 'Mizoram mipui duh dan ang ngeiin CBI-in a chhui mek hi chak tak leh dik takin chhui rawh se' tia thlaka pass an duh thung a, session a thukhawmte duhdanin 'Indian Airforce in Lengpui ram an lei dan chungchangah dan bawhchhiatna nasa tak leh corruption a awm ngei nia lang chu Mizoram mipui duh dan leh beisei ang ngeiin CBI-in an chhui chhuah thuai theih nan Mizoram sorkarin rang taka bawhzuiin chak takin hma la rawh se' tiin resolution hi lungrual taka pass a ni.



## HEALTH FESTIVAL

Nimin khan Dawrpui Multipurpose Centre Upate tana Hriselna Kut chu Directorate of Ayush leh Mizoram Upa Pawl tangkawpin hman a ni.

Hriselna Kutah hian Aizawl East Area chhunga MUP branch 22 atangin MUP member 200 chuang an kalkhawm a. He hunah hian upate tana hriselna tihthat nan leh vawnhim nana thil pawimawh tak tak sawi ho in in zirtir na hun neih a ni a. Upa tena natna chi hrang hrang an neihte leh a in enkawlna te zirtirna hun hman niin Programme zawhah a thlawna in entir na hun buatsaih a ni.

He huna khuallian Health Secretary Pi K.Lalrinzuali chuan Upate tana AYUSH damdawi hmanga inenkawl thatna leh AYUSH chungchang sawiin doctor hrang hrang ten hriselna chungchangah leh ramhmul damdawi chungchangah zirtirna an pe a, a thlawna in entir hi mi 120 vel an ni.



## MUHCS

Mizoram Universal Healthcare Scheme (MUHCS) zawm duha sorkar dawrtu Mizoram chhunga private damdawi-in 13 leh sorkar chuan damlo enkawlna leh a kaihnawih man chungchangah inremna an la nei thei lo.

Mizoram State Healthcare Society (MSHCS) hotute chuan Akashvani News Aizawl zawhna chhangin, nikum kumtawp lama MUHCS zawm duhtu Mizoram chhunga private damdawi-in 13-te indawrna an la neih mek thu an sawi a, private damdawi-in ten sorkara an rate duh ang an thehluh chu sorkarin rate a siam dan (package system) nen siamrem theih a nih loh thu an sawi.

### **Kan corr report lo ngaithla ang.**

*MUHCS hotute chuan private damdawi-inte hian an rate neihsa atanga zaa 10-a hniamin MUHCS an kalpui theih thu an thehlut tih an sawi a; hei hi sorkar package system nen a kalphung a inan loh avangin siamtha leh turin an ngen a, rate an duh dan an siamthatna hi private damdawi-inte hian sorkarah an la thehluh rih loh thu an sawi a ni.*

*Mizoram sorkar chuan tunthla ni 3 khan MUHCS kalpuitu damdawi-in hrang hrang hnenah damlo enkawlna senso atan cheng vbc 8 point 19 an pe chhuak a, heti hian nikum April ni 1 atanga tun thla ni 3 thleng khan sorkar chuan MUHCS kalpuitu damdawi-inte hnenah damlo nuai 1, sang 2 & 188 enkawlna senso atan cheng vbc 156 point 35 an pe chhuak tawh a ni..*



## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## HEALTHY LUNGLEI APP

Healthy Lunglei District Campaign kal tlanga January ni 29, 2026-a tlangzarh tak, "LushAI Healthy Lunglei" (LHL) Mobile App chu mipuite'n tangkai zawka an hman theih nana tihchangtlun dan tur leh tihlar dan tur sawihoin nimin khan Lunglei DC Pi Navneet Mann kaihhruaiin thuneitute an thukhawm.

Thutkhawmah hian Thawktute leh mipuite'n LushAI Healthy Lunglei app an hman dan report ngaihthlak niin, LushAITech lam atangin app tihchangtlunna kawnga an hma lak dan report ngaihthlak a ni bawka. App kal tlanga doctor appointment late'n hriattirna an dawn theih dan tur te, doctor leh damdawi dawrt'e'n anmahni dawrtu an awm tih hriattirna an dawn theih dan tur te, damdawi chah duhte'n dawr hlat zawng leh a phurhna man ngai zat an hriat nghal theih dan tur te, damdawi leh a kaihhnawih chah theih dah belh dan tur te, doctor-in damdawi a chawhna lehkha app-a dah luh dan tur leh app hmangtute puitu AI chatbot tihchangtlun dan tura rawtna leh hma lak dan tur hrang hrang sawi ho a ni a. LushAITech lam chuan app viltu bik an indah thu leh rawtna hrang hrang hmangin a tah tawla app an tihchangtlun zel thu an sawi.

Healthy Lunglei app hi Android Playstore atangin mi 370, Apple iOS App Store atangin mi 30, belh khawmin mi 400-in an phone-ah an dah lut (download) tawh a ni.



## ANIMAL INSURANCE

Animal Insurance kalpuina atan Mizoram sorkar chuan cheng nuai 132 point 98 a dawng tawh a; ASF avanga kum 2024-25 chhunga vawk suatte hnena zangnadawmna pek tur cheng nuai 636 pek leh tura ruahman mek a ni.

Assembly session neih mekah nimin khan AH&Vety minister Pu Lalsawivunga chuan zawhna chhangin, bawng, sial, vawk, kel leh beram vulhtu ten an ran vulhte an thih palha pawisa an hmuh theihna tura duah Animal Insurance kalpui nan Mizoram sorkar chuan National Livelihood Mission atangin pawisa first instalment leh second instalment cheng nuai 66 poin 49 ve ve a hmuh tawh thu a sawi a; 3rd leh 4th instalment pawh hmuh an beisei mek thu a sawi.

Pu C Lalsawivunga chuan ASF vanga kum 2024-25 chhunga vawk suat neitute hnenah central sorkar leh Mizoram sorkarin an intumsem atangin cheng nuai 1,559 vel an pek tawh thu leh kar hmasa Zirtawpni khan central atangin zangnadawmna tur cheng nuai 318 an dawn leh thu a sawi a, Mizoram sorkarin a tum ve tur cheng nuai 318 nen pek leh thuai tura ruahman a nih thu sawiin, kumin 2025-26 chhunga vawk suat neitute hnena zangnadawmna pek tur chu financial year 2026-27 annual action plan-ah telhin thla hmasa khan central-ah an thawn thlak tawh thu a sawi bawk.



## PM

Prime Minister Narendra Modia chuan agriculture-ah tunlai khawl thiamna technology culture hnuk lut tam turin sawrkarin theihtawp a chhuah a ti. Nimina Post Budget webinar-ah he thu hi sawiin Pu Modia chuan sawrkarin digital lama hmasawna ruhrel dinin Agristack hmangin agriculture lamah pawh tan lak a ni a ti a. Kisan ID siamte leh digital survey te chu inthlakdanglamna kawng pawimawh tak a ni a ti bawk. Pu Modia chuan PM Kisan Samman Nidhi hnuaiah loneitu vaibelchhe 10 chuang te hnenah cheng vaibelchhe nuai li chuang sem a ni tawh tih sawiin PM Faisal Bima Yojana hnuaiah cheng vaibelchhe nuai hnih chuang insurance tihfel tawh a ni a ti.



## **SPEAKER**

Karleh thawhtanni hian Lok Sabha Speaker Om Birla bang tura phutna resolution chu Lok Sabha-ah sawiho a ni dawn. Parliament session thawh hnihna hi tun thla March ni 9 hian tan leh a ni dawn a. Session thawhkhatnaah khan Opposition te chuan Lok Sabha Secretary General hnenah Speaker Om Birla rintawk lohna hriattirna lehkha an thehlut a. Speaker hian awn lam nei taka rorel a kaihhruai avangin a nihna atanga ban an phut a. He notice hi MP 118 in an hming an ziah hnan a. An zingah hian Congress, Samajwadi Party, DMK, Left leh party dangte an tel a ni.

